

歸綏識畧卷十五

崞縣張 曾小袁初輯

地部

倉庫

豐裕倉盈甯庫在綏遠城為駐防官員兵丁俸餉銀米及各廳錢糧監督稅課總出納地設立倉庫大使一員嵩司其事額設儲銀二十萬五千餘兩米二萬三千餘石屬糧餉同知管理如額米不敷支放隨時稟請採買軍需倉在歸化城內駝橋街內久安盈恒充裕六廩額儲谷五萬一千二百六十石係供支綏遠城官兵口糧之需

常平倉五廳皆有之歸化城設立在城外城隍廟側內蓋藏滿積聚豐六廩額儲谷三萬四百八十石零係按豐歉平糶及借給農民之需

土默特倉在歸化城內駝橋街內設隆字一廩儲谷二千石係支放副都統衙門俸米並托里布拉克台刺麻口糧及養濟院月米

土默特庫在舊都統署大堂東偏內收存房地租銀煤炭稅銀以備春秋祭祀將軍副都統廉俸官學膏火及脩補軍器操演公費繕書鋪司台站差使工使食并一切賞卹之用

義倉在三賢廟內儲谷一千二百一十二石以備凶荒賑濟

五廳錢糧稅課庫俱在本署隨徵隨解無庫儲定額托克托城倉在城內雍正中建舊存放徵收米石今統歸豐裕倉本倉所存惟常平倉谷

按是編畧做志乘之體倉谷一門自不容以不立惟盈虛豐儉未得其詳有弗

敢率爾置喙者計自弱冠後橐筆游幕幾三十年箋啓往復而外於古人語斷章取義寔有問錢谷不知問兵刑不知之愧况以倉庫重務非等迂儒紙上之說袁簡齋履兩江制府興革事宜謂常平者漢時良法而其弊已見於東漢劉般傳中社倉者宋時良法而其弊已見於金華社倉記其所謂條陳應革應興諸事與此間情形雖有不同而互通在乎其人從古所謂有治人無治法也至豐裕軍需兩倉採買之法尤關緊要賈誼曰積儲者天下之大命愚謂積儲以養兵與積儲以養民又異民之賴此積儲時少而軍之賴此積儲時多耳廩長立而馬益癯東坡斯言將聽牧人之盜其芻菽耶將何以治其末而求其本也識畧及此仍不過存其目云